



ԿՈՌՈՒՊՑԻԱՅԻ ԿԱՆԽԱՐԳԵԼՄԱՆ ՀԱՆՁՆԱԺՈՂՈՎ

ՈՐՈՇՈՒՄ N 02/2023

ԱՆՀԱՄԱՏԵՂԵԼԻՈՒԹՅԱՆ ՊԱՀԱՆՋՆԵՐԻ ԱՌԵՐԵՎՈՒՅԹ ԽԱԽՏՄԱՆ ՎԵՐԱԲԵՐՅԱԼ ՎԱՐՈՒՅԹ ՀԱՐՈՒՑԵԼՈՒ ՄԱՍԻՆ

ք. Երևան

19 հունիսի 2023 թվական

Կոռուպցիայի կանխարգելման հանձնաժողովը, կազմով՝ Հայկուհի Հարությունյանի, Արամայիս Փաշինյանի, Նարեկ Համբարձումյանի, Մարիամ Գալստյանի և Լիլիթ Ալեքսանյանի (այսուհետ՝ Հանձնաժողով), ուսումնասիրելով դատախազների առաջխաղացման ցուցակում ընդգրկվել հավակնող ՀՀ Գեղարքունիքի մարզի դատախազի տեղակալ Գագիկ Արմենակի Այվազյանի վերաբերյալ իրականացված բարեվարքության ուսումնասիրության արդյունքները.

պարզեց

Հանձնաժողովը, հիմք ընդունելով «Դատախազության մասին» օրենքի 39-րդ հոդվածի 2-րդ մասի 2-րդ կետով և «Կոռուպցիայի կանխարգելման հանձնաժողովի մասին» օրենքի (այսուհետ՝ Օրենք) 26.1-րդ հոդվածով սահմանված իրավակարգավորումները, իրականացրել է դատախազների առաջխաղացման ցուցակում ընդգրկվել հավակնող Գագիկ Արմենակի Այվազյանի վերաբերյալ բարեվարքության ուսումնասիրություն, որի արդյունքում պարզվել է հետևյալը.

1. Գագիկ Այվազյանը 2014 թվականից սկսած զբաղեցրել է ստորև նշված պաշտոնները՝

- 2014 թվականի դեկտեմբերի 14-ից Քննչական Կոմիտեի Լոռու մարզային քննչական վարչության Ստեփանավանի քննչական բաժնի քննիչի,
 - 2016 թվականի հուլիսի 6-ից Քննչական Կոմիտեի Տավուշի մարզային քննչական վարչության Դիլիջանի քննչական բաժնի քննիչի, ապա՝ ավագ քննիչի, այնուհետև՝ բաժնի պետի տեղակալի,
 - 2019 թվականի հուլիսի 4-ից Տավուշի մարզի դատախազության դատախազի, այնուհետև՝ Տավուշի մարզի դատախազության ավագ դատախազի,
 - 2021 թվականի հունիսի 28-ից Տավուշի մարզի դատախազի տեղակալի,
 - 2022 թվականի նոյեմբերի 11-ից մինչ օրս Գեղարքունիքի մարզի դատախազի տեղակալի պաշտոնը:
2. Արդարադատության նախարարության Իրավաբանական անձանց պետական ռեգիստրում առկա տվյալների համաձայն՝ Գագիկ Այվազյանը **2011 թվականի մարտի 4-ից մինչև 2023 թվականի մարտի 17-ը** հանդիսացել է «ԿԱՐԱՆԳԱ» ՍՊ ընկերության (ՀՎՀՀ 02800442, այսուհետ՝ Ընկերություն) **100% բաժնեմասի սեփականատեր և գործադիր մարմնի ղեկավար**:
3. Հանձնաժողովի 2023 թվականի ապրիլի 3-ի թիվ Ե-01/790-2023 գրությանն ի պատասխան Պետական եկամուտների կոմիտեի կողմից 2023 թվականի ապրիլի 5-ին ներկայացված թիվ Ե-01/71-6/20163-2023 գրությամբ ստացած տեղեկատվության համաձայն՝ Գագիկ Այվազյանը՝ որպես Ընկերության տնօրեն, **2020 թվականի փետրվարի 11-ին** Պետական եկամուտների կոմիտե դիմում է ներկայացրել՝ Ընկերության հաշվետվությունների ներկայացման էլեկտրոնային համակարգում որպես առցանց լիազոր (համակարգչային ադմին) Արմենակ Այվազյանին գրանցելու վերաբերյալ:
4. 2021, 2022 թվականներին Ընկերության առցանց լիազորը (Գ. Այվազյանի հայրը՝ Արմենակ Այվազյանը) Պետական եկամուտների կոմիտե հայտարարություն է ներկայացրել շրջանառության հարկ վճարող համարվելու, իսկ 2023 թվականին՝ միկրոձեռնարկատիրության սուբյեկտ համարվելու վերաբերյալ:
5. Արդարադատության նախարարության Իրավաբանական անձանց պետական ռեգիստրում առկա տվյալների համաձայն՝ **2023 թվականի մարտի 11-ին** Գագիկ Այվազյանն Ընկերության կանոնադրական կապիտալի իր 100% բաժնեմասն

օտարել է (նվիրատվության պայմանագրով) Հրաչուհի Հարությունյանին, ով մինչ օրս հանդիսանում է Ընկերության 100% բաժնեմասի սեփականատեր և գործադիր մարմնի ղեկավար:

6. Ընկերության կանոնադրական կապիտալում բաժնեմասնակցության, գործադիր մարմնի ղեկավարի պաշտոնը զբաղեցնելու, ինչպես նաև իր բաժնեմասը հավատարմագրային կառավարման հանձնելու վերաբերյալ տվյալներ ներկայացված չեն Գագիկ Այվազյանի 2019, 2020, 2021 թվականների տարեկան հայտարարագրերի՝ «Բ.3 Արժեթղթեր և այլ ներդրումներ», «Դ.1 Մասնակցությունը առևտրային կազմակերպություններում», «Դ.2 Ներկայացվածությունը առևտրային կազմակերպությունների կառավարման, վարչական կամ վերահսկողական մարմիններում» և «Դ.3 Պաշտոն զբաղեցնող անձի մասնակցությամբ առևտրային կազմակերպությունում բաժնեմասը հավատարմագրային կառավարման հանձնելը» բաժիններում:

«Դատախազության մասին» օրենքի 49-րդ հոդվածի 1-ին մասի համաձայն՝ դատախազը չի կարող զբաղեցնել իր կարգավիճակով չպայմանավորված պաշտոն պետական կամ տեղական ինքնակառավարման այլ մարմիններում, **որևէ պաշտոն առևտրային կազմակերպություններում, զբաղվել ձեռնարկատիրական գործունեությամբ**, կատարել վճարովի այլ աշխատանք, բացի գիտական, կրթական և ստեղծագործական աշխատանքից»:

«Հանրային ծառայության մասին» օրենքի 4-րդ հոդվածի 2-րդ մասի համաձայն՝ **հանրային պաշտոնը** դասակարգվում է խմբերի՝ **պետական** և համայնքային: Նույն հոդվածի համաձայն՝ պետական պաշտոնները դասակարգվում են տեսակների՝ քաղաքական, վարչական, **ինքնավար** և հայեցողական:

Նշված օրենքի 7-րդ հոդվածում սահմանված **ինքնավար պաշտոնների** շրջանակում ներառված է նաև դատախազի պաշտոնը:

Նշված օրենքի 31-րդ հոդվածի 5-րդ մասի համաձայն՝ **հանրային պաշտոն** զբաղեցնող անձինք և հանրային ծառայողները պաշտոնում **նշանակվելուց (ընտրվելուց) հետո՝ մեկ ամսվա ընթացքում**, պարտավոր են ապահովել սույն հոդվածի 1-ին մասով սահմանված պահանջների կատարումը:

Նույն հոդվածի 6-րդ և 7-րդ մասերով սահմանվում են առևտրային կազմակերպությունում պաշտոն զբաղեցնելու և ձեռնարկատիրական գործունեությամբ զբաղվելու հասկացությունները:

«Հանրային ծառայության մասին» օրենքի իմաստով առևտրային կազմակերպությունում (բացառությամբ Հայաստանի Հանրապետության մասնակցությամբ միջազգային պայմանագրերի հիման վրա ստեղծված կազմակերպությունների) պաշտոն զբաղեցնելու ներքո հասկացվում է՝

1) առևտրային կազմակերպության **կառավարման մարմնում ընդգրկված լինելը**.

2) առևտրային կազմակերպությունում ցանկացած այլ պաշտոն զբաղեցնելը.

3) առևտրային կազմակերպության գույքի հավատարմագրային կառավարիչ լինելը.

4) սույն մասի 1-3-րդ կետերում նշված դեպքերից բացի, **որևէ այլ ձևով առևտրային կազմակերպության ներկայացուցչական, կարգադրիչ կամ կառավարման գործառույթների իրականացմանը ներգրավված լինելը**: (...)

Նույն օրենքի իմաստով **ձեռնարկատիրական գործունեություն է** համարվում՝ (...)
առևտրային կազմակերպության **մասնակից լինելը**, բացառությամբ այն դեպքի, երբ առևտրային կազմակերպության մասնակցի բաժնեմասն ամբողջությամբ հանձնվել է հավատարմագրային կառավարման:

Օրենքի 27-րդ հոդվածի 1-ին մասի 3-րդ կետի համաձայն՝ վարույթ կարող է հարուցվել՝ հանձնաժողովի նախաձեռնությամբ՝ հայտարարագրերը վերլուծելիս կամ օրենքով նախատեսված վարույթ իրականացնելիս առերևույթ խախտումներ կամ դեպքեր հայտնաբերելու դեպքում:

Օրենքի 27-րդ հոդվածի 2-րդ մասի համաձայն՝ Հանձնաժողովը պետական պաշտոն զբաղեցնող անձանց, ... կողմից «Հանրային ծառայության մասին» Հայաստանի Հանրապետության օրենքով սահմանված **անհամատեղելիության պահանջների առերևույթ** խախտումների, ... առկայության պարագայում հարուցում է համապատասխան վարույթ:

Հաշվի առնելով նշված հանգամանքները և ղեկավարվելով «Կոռուպցիայի կանխարգելման հանձնաժողովի մասին» 27-րդ հոդվածի 1-ին մասի 3-րդ կետով, 22-րդ հոդվածի 1-ին մասի 2-րդ կետով և 31-րդ հոդվածի 2-րդ մասով, Հանձնաժողովը.

Ո Ր Ո Շ Ե Ց

1. ՀՀ Գեղարքունիքի մարզի դատախազի տեղակալ Գագիկ Այվազյանի կողմից անհամատեղելիության պահանջների առերևույթ խախտման հիմքով հարուցել վարույթ:
2. Սույն որոշումը եռօրյա ժամկետում ուղարկել ՀՀ Գեղարքունիքի մարզի դատախազի տեղակալ Գագիկ Այվազյանին:

ՀԱՆՁՆԱԺՈՂՈՎԻ ՆԱԽԱԳԱՀ՝



ՀԱՅԿՈՒԿԻ ՀԱՐՈՒԹՅՈՒՆՅԱՆ

